

TE HEHEURAA API


I neia i te piha neneiraa a te Ekalesia a Iesu Mesia i te Feia Mo'a i te Mau Mahana Hopea Nei, i Papeete, Tahiti, i te mau fenua Sotaiete, i te mau avae atoa. Te hoo, e piti farane i te matahiti hoê.

“E ao to tei hiaai i te maitai; e faaîhia hoi ratou.”

Nu. 1.

Tenuare, 1913.

Mat. 6.



TE HOE FARE PURERAA TAHITO TEIE I BETELEHEMA.

Ua patuhia teie nei fare pureraa e te Emepera ra, e Totatine, i te matahiti 330 i muri mai i te Mesia, e te vai maitai noa ra ia i reira i teie nei taime. Ua mana'ohia e te mau taata no Betele-hema e, ua patuhia teie nei fare pureraa i nia iho i te vahi mau, i fanau mai ai o Iesu Mesia ra.

Te Parabole o te Ueue Huero.

U A haere atura te ueue huero e ueue i ta'na huero. 1. Mairi ihora te tahi pae i te pae aratia i te ueueraa, e taataahihia ihora e te avae, e titohia maira e te manu o te reva. 2. Mairi ihora te tahi pae i nia i te pāpā, e tupu a'era, oriorio atura i te rarirari ore. 3. Mairi ihora te tahi pae i roto i te aihere, tupu atoa a'era te aihere, apiapi atura. 4. Mairi ihora te tahi pae i te vahi repo maitai, tupu a'era e hotu ihora taihoê hanere i te huero hoê. Na reira'tura oia, e ua pii atura, "E tari'a to'na ei faarooraa, a faaroo mai oia." Luka, 8: 5-8.

TATARARAA.

Eaha te parabole o te huero nei? Te parau a te Atua. Luka 8: 11. Haere atura te ueue huero. O vai te ueue huero? O te tamaiti a te taata. Mataio 13:37. Eaha te huero? O te parau a te Atua.

Eaha te huero i mairi i te pae aratia? Oia te feia i faaroo noa tei tihia mai te parau e te diabolio i roto i to ratou aaui ra, oi faaroo ratou oi ora. Eaha te huero i mairi i nia i te pāpā? Oia te feia i farii i te parau ma te oaoa ia faaroo ra, no te mea râ aita i aahia i roto ia ratou, e faaroo tape-tapete ia ratou, ia roohia e te ati taa ê atura.

Eaha te huero i mairi i te vahi aihere ra? Oia te feia i faaroo, i fifi i te mau peu o teie nei ao, e te tao'a, e te mau mea e navenave ai ra, i apiapi ai te parau i ore i hotu mai ai i te huero maitai. Eaha te huero i mairi i te vahi repo maitai? Oia te feia ua faaroo ana'e i te parau, tapea maite ihora i roto i te aaui haavare ore, e te au, e e tia i te faahoturaa i te huero.

E hoa ino ma e, e te mau taata tupu e, e te mau hoa e, e te mau enemî e, a hi'opoa i te huru o teie nei mau parau. Ua riro ia ei a'oraa mai i te feia e faaroo i te parau a te Atua. E ora râ to tei haapao. —NA RUA.

Eiaha e Faaino.

“Eiaha e faaino, ia ore outou ia faainokia mai.” Mat. 7:1.

TE vai nei i roto i teie ao, tausani, e tausani te taata, aita i feruri maitai i teie nei mau irava parau. Ua na reira'toa hoi te mau orometua no te hoê mau faaroo, te neinei nei ratou i to ratou mau vea ei faainoraa'tu i te tahi faaroo. Ua tanu ratou i teie nei huero taero i roto i to ratou aau, oia hoi, te faaino. Ua riro anei ratou ei tavini mau no te Mesia i reira? Aita roa ïa, mai ta Paulo i parau maira e, “E ere hoi te reira i te tavini no to tatou Fatu ra no Iesu Mesia, no to ratou iho opu râ, e ua haavare i te aau o te feia paari ore ra, i te parau paia e te taparu”. Roma 16:18. “E hohoa paieti hoi to ratou o te puai râ o te reira ra ua hunahia ïa, ia ratou.” 2 Timoteo 3:5.

No reira i puroro mai ai te anavai rahi ra, o te haavare, te tahi, te mârô, “te hinaaro i te mau mea e navenave ai ra aore i hinaaro i te Atua”. 2 Timoteo 3:4. Te nafea maira, ta Iakobo parau, i papai atu i te ati Hebera, (na opu tino ahuru ma piti o Iseraela)? Te na ô maira oia: “O te taata hoi ia haapao hua i te ture atoa ra, ia hapa râ oia i te ture iti hoê ra, ua hapa ïa oia i te mau ture atoa ra.” Iakobo 2: 10. Te na ô maira hoi o Paulo e, “E teie nei, e mea mo'a te ture, e mea mo'a hoi te parau, e te hapa ore, e te maitai.” Roma 7: 12.

E no reira te ite nei tatou e, e mea mo'a te ture, e mea mo'a hoi te parau, i papai ai Iakobo i te parau i te feia haapao ture, a na ô atu ai: “Eiaha na outou, e au mau taeae, e parau ino te tahi i te tahi; o tei parau ino i tana taeae, e ua faahapa i tana taeae, ua parau ino ïa i te ture, e ua faahapa i te ture: ia faahapa râ oe i te ture ra, e ere ïa oe i te haapao ture, e faahapa râ.” Iakobo 4: 11.

O te huru anei teie o ta te Varua Maitai haapiiraa ia ratou? E ere roa ïa haapiiraa i ta te Varua Maitai; no ô mai râ i te diabolô ra, no te mea o te diabolô ïa to ratou


HISTORIAN'S OFFICE LIBRARY

The Church of Jesus Christ of Latter-day Saints

13244

tumu, o tei ueue i teie nei huero taero (faaino) i roto i to ratou aau. Ioane 8: 44. Eaha râ ta te Varua Maitai haapiiraa? "Area ta te Varua e faatupu ra, o te hinaaro ia, te oaoa, te hau, te faaoromai, te mârũ, te maitai, te faaroo. 23 Te mamahu, te hitahita ore, aore hoi e ture i te reira." Galatia 5: 22, 23. Te na ô maira Petero e, "O te hinaaro hoi i te ora ra, e ia maitai to'na ra pue mahana, e. tapea oia i to'na arero i te ino." Petero I, 3: 10. Te na ô atoa maira Iakobo e, "E ueuehia te parau-tia ma te hau e te feia e faatupu i te parau hau ra." Iakobo 3: 18.

Te nafea nei te haapiiraa a te mau orometua Moromona? Te ueue nei ratou i te parau a te Atua, mai ta Paulo, Petero e o Iakobo. Eita e faaino atu ia vetahi, e haapii atu râ ratou i te taata i te mea tia, e te parau-mârũ-raa'tu i te taata, mai ta Paulo i parau atu i te Ekalesia i Kolosa, a na ô atu ai: "Ei parau mârũ maitai ana'e â ta outou, ia rapaauehia i te miti ra i te ite." Kolosa 4: 6.—DAHA PUHARA.



TE UPUTA NO TE OIRE RA, NO DAMASEKO.

HISTORIAN'S OFFICE LIBRARY

The Library of the Church of Jesus Christ of Latter-day Saints

44581

Te Parau Tuatapapa no
Iosepha Semita.

(TUATIRAA.)

PENE XXVIII.

MATAHITI 1838.

*Ua tama'i atura te enemy i to te oire ra, to De Wita. Tama-
ta ihora Iosepha i te faaora i to te oire, aita râ i manuïa.
Ua tiahi-ê-hia'tura te enemy i te vahi, i parauhia Adamu-
Onidi-Ahmana. Ua taparahikia ihora te Aposetolo ra,
o Patena, i roto i te aroraa no Anavai Pi'o. Ua haama-
tahia te tiahi-ê-raa'tu i te Feia Mo'a i Hauna Mila.
Te puta ino no Alama Semita, e te faaroo puai no to'na
metua vahine.*

AITA noâ i tia i te enemy ia tama'i atura i te Feia Mo'a
i te mataeinaa ra, i Daviesa, i taua taime ra, no to
ratou hiaai i te taparahi, e te haamanii i te toto no te taata,
aita'toa i tia ia ratou ia parahi noa ma te hau. I te mahana
2 no Atopa, ua iteahia teie nei iho â mau taata, o tei faatupu
i te peapea i Daviesa, i haaputuputuhia e ati noa'e i te oire
nainai ra, i De Wita, i te mataeinaa ra, i Carola, i raro a'e i
te faaaratairaa o te mau taata ra, o Ausina, e o Asahele, e o
Sasahiela, te hoê orometua no te hoê haapaoraa Porosetani.
Tei ia ratou te mau pupuhi, e te tahi pupuhi fenua, e haamata
ihora ratou i te pupuhi i roto i te oire. I te mahana i muri
iho, amui maira o Paraka, raatira, e na pŭpŭ faehau e piti,
ia ratou e riro ihora ratou paatoa, e mau enemy ino roa no
te Feia Mo'a.

Ia faaoromai maite te Feia Mo'a i te pupuhiraa o te
enemy i na mahana e piti, pupuhi ihora te mau taeae ia ratou
i raro a'e i te faaueraa o Tihoti M. Hinakele, raatira.
Rahi noâ te enemy i te Feia Mo'a, mâta'u ihora ratou i te
tama'i noa mai, e no reira i faaea ratou, ia amuihia'i ratou
e te tahi atu mau enemy. Ia faaroo te raatira ra, o Lucasa

e, ua mairi te tahi mau taata i roto i taua aroraa ra, papai atura oia i te tavana i te na ôraa'tu e, mai te mea ua haapohehia te hoê taata no Carola, e haaputuputuhia e pae tausani taata ia tama'i atu i te mau taata Moromona, i mua a'e i na mahana e pae, "e e haamou-roa-hia taua mau taata ino ra."

Ua faaroo ihora te Peropheta e, te parahi ra to'na ra mau taeae i roto i te ati, i Carola, e haere oioi atura oia i te oire ra i De Wita. Te huru, te haere noa'tura oia i to'na poheraa, no te mea, ua tiaï-noa-hia te purumu, e tae atu i De Wita, e te mau taata, o tei hinaaro puai i te taparahi ia'na. Aita râ oia i haamana'o i to'na iho ora, no te mea ite ihora oia e, e tia ia'na ia faaitoito e ia tamahanahana i te Feia Mo'a i reira. Ua ani atura oia i te mau haavâ, i te parururaa i te Feia Mo'a na roto i te ture, aita râ ratou i faatia. Na roto râ i taua mau tamataraa na'nara, e rave rahi te mau taata o tei papai i te mau leta na te tavana, i te faaiteraa'tu ia'na e, e mau taata hapa ore ia te Feia Mo'a i te Mau Mahana Hopea Nei, area râ te hamani-ino-noa-hia ra ratou; aita râ te tavani rahi ra, o Boga, i tauturu mai ia ratou.

Ua mâta'u ihora te enemi i te haamata faaite i te aroraa, area ua tutui ratou i te auahi i to ratou mau fare, e tupai, e tunu ihora i ta ratou mau puaatoro, a pohe noa'i te mau taata, na ratou iho hoi teie nei maa, i te poia i roto i te oire. E mea faufaa ore ia na reira noa te Feia Mo'a, e no reira faatia ihora ratou i te faarue i taua oire ra, mai te mea e noaa ia ratou te moni no to ratou mau fare, e te fenua. Faarue ihora ratou i reira, aita râ i noaa ia ratou te hoê mea. E haerea ri'ari'a roa ia, mai De Wita e tae atu i Fa Wese, no te mea aita roa te enemi i faatia ia haere maite noa ratou ma te hau, mai ta ratou i parau mai ia ratou. Ua tamata ihora te hoê metua vahine, o tei fanau i te aiû i te mahana i mua a'e i te reira, i te haere; ua paruparu roa râ oia, e i mua i to ratou taeraa'tu i Fa Wese, pohe roa ihora oia, e ua tanuhia, mai te tahi atu â mau taata i taua taime ihora, ma

te afata ore i pihaiho i te purumu.

Ia faarue atura te Feia Mo'a i taua oire ra, parau atura te hoê orometua Porosetani o Woda to'na io'a, i ta'na ra mau hoa e, e haere ratou i te mataeinaa ra, i Daviesa e tiahi ê atu i te Feia Mo'a i te vahi, i parauhia Adamu-Onidi-Ahmana. Ua parau atura oia e, ua fatata te taime no te hooraa fênuu, e mai te mea ua manuïa ratou i reira, mai i te oire ra, i De Wita, e tia ia ratou ia hoo mai i te mau fenua, ta ratou i hoo atu i te mau taata Moromona i mua'e i te reira, i te maa moni iti roa. Ia faaroo Iosepha e, te haere maira ratou, imi faahou atura oia i vahi ino, e tei rotopu oia i te Feia Mo'a, ia tae maira te enemi.

Ua taiohia te numera no te enemi, e hoê tausani taata, e haru atura ratou i te mau mea no te mau faaapu i rapaeau i te oire. Tei roto iho â te mau taata, e te vahine, e te tamarii i te mau vero ri'ari'a rahi no Atopa, mai te ore e tapo'i ia paruru ia ratou. O Anega Semita ia te hoê no ratou. Ua haere atura ta'na tane, o Dona Carolo Semita, te tuaana no Iosepha, e poro-haere i te Evanelia. Ia taauahihia to'na fare, haere ê atura oia i te enemi, i te afairaa'tu i ta'na na aiû e toopiti i roto i to'na rima, e aita roa oia i faaea ia tae noa'tura oia i tera pae mai no te anavai ra, no Garanada. I teie nei râ, tanohia ihora o Limana Uaita ia faaaratai i te tahi pûpû taeae e tama'i atu i taua mau taata mâta'u ra, e ua horo atura ratou, area râ, a horo atu ai ratou, taauahi ihora ratou i te tahi mau fare, ei reira haaparare atura ratou i te parau haavare e, na te mau Moromona iho â tera ohipa ino i rave.

I te 24 no Atopa, 1838, ua aratai atura te raatira ra, o Bogarata, te hoê ia orometua no te haapaoraa Metodi, i ta'nâ ra mau faehau i to ratou puhapa i te hiti o te anavai ra, o Pi'o. Ua haru ihora ratou i na taeae e tootoru, no roto mai i to ratou na fare, e faaite atura ratou e, i taua pô ihora e taparahihia teie nei na taeae. Ia tae atura te parau apî i Fa Wese, tonono vave atura o Hinakele, raatira, ia Davida W.

Patena, e e pae ahuru atu â mau taeae ia faaora'tu ia ratou. Ua tae atura ratou i te puhapa no te enemi i te aahiata, e a haafatata'tu ai ratou i te enemi, no nia atu i te tahi aivi, pupuhi ihora te enemi, o tei tapunihia i rotopu i te mauraau, ia ratou, e ua mairi te tahi na taeae i raro.

Ua faaue ihora Davida Patena ia pupuhi atoa te mau taeae, ei reira horo oioi atura ratou i pihaiho i te enemi. Ua tama'i puai atura ratou, te tahi i te tahi, i te tahi na minute, ei reira, rahi noâ te mau enemi i te mau taeae, fariu ihora te enemi e horo ê atura. A horo ê atu ai ratou, ua fariu mai te hoê taata, e pupuhi maira oia ia Davida Patena, raatira, e i taua pô ra, pohe roa ihora oia. Ia pohe oia, tei pihaiho ia'na te Peropheta, e ta'na ra mau hoa mau, e ua parau atura oia i ta'na parau hopea i ta'na ra vahine, i te na ôraa'tu e, "Noa'tu te mau mea ta oe e rave, eiaha roa e taiva i te faaroo." E na reira te Aposetolo ra, o Davida W. Patena i te pohe, o tei horoa'tu i to'na iho ora i te faaoraraa'tu i ta'na ra na taeae, e aita roa e taata aroha ê atu i tei reira.

Ua riro teie nei aroraa ei otoheraa na te mau parau haavare, i haapararehia e ati noa'e i Missouri, e tei faariri i to Missouri paatoa. No taua parau haavare ra, mâta'u ihora te tahi mau taata maitatai, e mana'o ihora ratou e, e tae mai te mau taata Moromona e haamou roa ia ratou ra. Aita te tavana ra, o Boga, i haavarehia, area râ faaue ihora oia ia haere atu e piti tausani taata e taparahi i te mau taata Moromona e hope roa'e, e aore râ, e tiahi ê atu ia ratou i taua fenua ra.

Ua haamatahia te tiahi-ê-raa'tu i Hauna Mila, i te mataeinaa ra, i Calavela, i te mahana 30 no Atopa. A parahi noa'i te mau Feia Mo'a i reira ma te hau, ua tae vave maira e maha ahuru taata na nia mai i ta ratou puaahorofenua e haamata ihora ratou i te pupuhi, mai te ore i faaara mai i te mau taata. Aita roa ratou i hi'o aroha mai i te hoê noa iho no te Feia Mo'a; taparahi noa atura râ ratou i te taata, e te

vahine, e te mau tamarîi atoa hoi, a ani noa'i ratou no to ratou mau ora, ei reira haru ihora ratou i te mau mea no te mau tino pohe. I taua ahiahi ihora ua taparahihia na taata e hoê ahuru ma hitu, aita râ e taime ia heru i te mau apoo no ratou. A autâ noa'i te mau vahine, e te mau tamarîi, e a tahe noa'i to ratou mau roimata, ua hurihia ihora te mau tino pohe i roto i hoê apoo tahito, e te vai noa ra ratou i reira ei porao viivii i nia iho i taua fenua tiamâ ra.

Ia ite atura te tamaiti ra, o Alama Semita, e vau to'na matahiti, i te taparahi-raa-hia o to'na metua tana, e to'na tuaana, pupuhihia ihora oia, e ua mairi oia i raro ma te puta ino roa i roto i to'na humaha. Ua ite oia e, mai te mea e tai oia, e aore râ, e ani atu ia ratou ia hi'o aroha mai ia'na mai to'na tuaana i te huru, e taparahi-pohe-roa-hia oia e taua mau taata ino ra. No reira, taoto noa oia i raro, mai te faahua pohe, a tae noa'tu i te pô, ia faaroo oia i te piiraa mai a to'na metua vahine. Ua tuu atura oia ia'na i pihai-iho i te na tino pohe no to'na metua tane, e to te tuaana, ei reira pure atura to'na metua vahine i te Atua ia faaite mai i te ravea ia faaorahia ta'na ra tamaiti. Faaroo ihora te Atua i ta'na pure, e faaite maira Oia ia'na ia tuu i te tahi rehu auahi i roto te tahi pape, ei reira, horoi maitai i te puta. Ia mâ maitai, parau maira te re'o ia'na ia hamani i te tahi raau faaote i te mau aa no te tahi huru raau i reira e faaî roa i te apoo i roto i te humaha no te tamaiti. Na Viliadi Semita, te tahi atu tamaiti o tei ore i pupuhihia, i haapue i teie nei mau aa, e hamani ihora te metua vahine i taua raau ra. Ua faautua maira te Atua i ta ratou mau pure faaroo, e ua faaorahia Alama, e tupu ihora oia i te rahiraa.

—OLE PETESONA.

(E tuatihia mai teie parau.)

“E teie nei, tei roto i te feia o te ekalesia te hoê ture vai tuutuu ore ra, eiaha te hoê taata ekalesia e tia mai e hamani ino i tei rapae i te ekalesia, e eiaha ei hamani ino e tupu i roto ia ratou iho.” B. a M. Alama 1: 21.

Te Mau Parau Api.

U A iteahia te hoê daimoni rahi roa i te fenua ra, i Afarica, o te hau i te rahi i te mau daimoni atoa i roto i te ao nei. Teie to'na faito, oia hoi 1,649 karata. E daimoni faufaa rahi roa ïa.

Na roto i te taioraa o te taata rahi, o te faatere i te mau huru haapii-raa atoa no te hau Amerika, o P. P. Claxton to'na i'oa, ua iteahia e, ua iti roa te mau taata ite ore no te tufaa fenua ra, no Utaha, i te mau taata ite ore no te mau tufaa fenua atoa i Amerika.

Ua tae maira te parau apî e, te faaineine nei to te hau Taina, oia hoi te hau Tinito, i te tama'i atu i to te hau Rusia. No te hamani-ino-raa o te mau faehau no Rusia i te mau taata no Taina, e faatupuhia teie nei tama'i. Ua faatiahia ibora e to Taina te hoê nuu rahi roa, e ono ahuru tausani taata te rahiraa, e ua tonohia'tura ratou i te fenua ra, i Monogolia e tiahi ê atu i te mau taata Rusia i reira.

I te 24 no Novema i mairi a'enei, ua tupu te hoê ahoaho ri'ari'a i te fenua ra, i Paniola. Te haapaohia ra te hoê teata hoho'a, mai tei faaitehia i Tahiti nei; e rave rahi roa râ te mau taata, e te mau vahine, e te mau tamarii o tei tairuru i reira e mataitai i taua mau hoho'a ra. A faaite-noa-hia'i te hoê hoho'a, taauahihia ibora te macine faaiteraa hoho'a, oia hoi te kinematogaritha, e pii hua'tura te taata faatere e, E auahi! I taua taima ibora, tia maira te mau taata paatoa, e tamata a'era ratou i te haere i rapae i te fare teata, area râ no te rahiraa o te mau taata, aita roa i tia ia ratou ia haere na roto i te mau opani, e mairi ibora te tahi pae i raro, e ua taataahihia ratou e te mau taata, e pohe roa ibora. Ia hope te mau taata ora i te tae i rapae i taua fare teata ra, ua iteahia e, ua pohe roa e pae ahuru taata e tiahapa, e o te mau tamarii ïa te pae rahi no ratou.

I te oire ra, i Niu Ioka, i Amerika, ua haere atura te hoê vahine, e e toomaha taata na nia i te hoê pereoo uira. Ua faaipoipohia râ teie nei vahine i te hoê taata ê, e aita roa ta'na tane i ite e, ua haere oia e teie nei na taata'toa, area râ a tamata atu ai ratou i te faafariu mai i to ratou pereoo i te hoê purumu pirihau, hurihia ibora te pereoo, e topa atura ratou paatoa i raro, mai nia atu i te hoê mato, e hoê hanere, e pae ahuru avae te teitei. Ia iteahia ratou i raro, ua pohe roa te vahine, e ua haaparuparu-roa-hia e toopiti taata, area râ ora roa ibora e toopiti taata, e horo ê atura raua. Ua iteahia i roto i te pute no te hoê taata tei haaparuparuhia, te mau huru tao'a faufaa rahi, no teie nei vahine, o tei au i te moni, e 6,000 dara. Ua iteahia ibora te tino pohe no teie nei vahine e ta'na tane i te vai-noa-raa i roto i te fare no te mutoi, e e mihi iti rahi to'na; teie râ te hopea no te reira huru ohipa ino.

Ua tupu te hoê vero rahi roa i te fenua ra, i Jamaica, te hoê fenua moana, i te 20 no Novema i mairi a'e nei, e ua teitei roa te miti i reira, e haamou-roa-hia ihora te tahi na oire. Ua pohe roa e pae ahuru ma piti taata i te hoê vahi ana'e, aita râ i iteahia te rahiraa o te mau taata taatoa, i pohe i roto i taua vero rahi ra. Te tauturu noa'tura te mau taata êê i te mau taata, tei parahi i roto i te ati i reira, no te mea ua haamouhia to ratou mau fare, e aita ta ratou e maa.

Te hamani nei te hau Amerika i te hoê pahi manuâ rahi roa, e e mairihia te i'oa ra, o Niu Ioka, i nia iho ia'na. Ua parauhia e, e hau roa teie nei pahi i te rahi i te mau pahi manuâ atoa no te mau hau rarahi o te ao nei. E 27,000 tane ia te rahiraa o teie nei pahi, e tei nia iho ia'na te tahi mau pupuhi, e hoê ahuru ma maha initia te rahi; e tere oia e piti ahuru ma hoê maile pahi i te hora hoê, e ua hamani-puai-roa-hia ia i te mau vahi paatoa. Te opua noa nei â te hau Amerika, e te mau hau rarahi atoa i te hamani i te tahi atu â mau pahi rahi roa.

Ua hamani ihora te hoê taata Amerika, o S. P. Edmonds to'na i'oa, i te tahi huru roi, ei mea faaora i te mau taata i nia i te moana, i te taime e roohia'i ratou e te ati, e e tomo ai to ratou pahi i raro i te moana. E faaauhia te hoê roi faaora i te mau roi, tei roto i te mau piha atoa i nia i te pahi, e ia roohia te pahi e te ati, e tuuhia teie nei mau roi i raro i nia i te moana, ei reira e tia roa i te mau taata ia painu noa, ia iteahia ratou e te mau pahi rarahi. Ua tamatahia teie nei ravea apî, e ua iteahia e, e mea maitai roa ia. Te imi noa ra te mau taata paari i te tahi atu â mau ravea.

Ua faaite-papu-hia, e te mau taata paari o te ao nei, te rahiraa o te mau ohipa ino i ravehia i roto i teie nei ao, i te mau matahiti, e te mau taata taero, e e te mau taata o tei inu noa i te mau huru ava. Ua faaitehia e, o te ava ia te tumu no te pae rahi o te mau ohipa ino paatoa i ravehia e to te ao nei, e no reira ua ite tatou i te ino rahi o taua ohipa inuraa ava ra. I te mau matahiti atoa, ua taparahihia e toru tausani, e ono hanere vahine, i te pupuhitereumu, e te to'i, e te tipî, e te raau, e te tahi atu â mau mauhaa, e te mau taata o tei inu i te ava. I te mau matahiti atoa, ua taparahihia e piti tausani, e pae hanere aiû e to ratou mau metua tane taero, o tei haere mai i te fare i te pô, e mairi i nia iho i te mau aiû, a taoto ai ratou i nia i te mau roi. O te inuraa ava ia te tumu no te pae rahi o te mau faataaraa i te tane e te vahine. No te inuraa i te ava, ua riro e hoê hanere, e vau ahuru tausani taata e te vahine, ei mau taata maamaa roa i te mau matahiti atoa. E ua faaite-atoa-hia e, ahiri i tia i te mau taata o tei pohe i te mau matahiti atoa, no ta ratou inuraa i te ava, i te tia i muri iho te tahi i te tahi, e tae ratou e hitu ahuru ma piti maile te roa. A hi'o na tatou i teie nei ohipa ino; e ia riro teie faaiteraa ei faaararaa na tatou paatoa, e eiaha tatou e inu noa'tu i taua mau mea taero roa ra.

Ua fatata roa te hoê taata i Utaha, i Amerika, o Farani Camerona to'na i'oa, i te pohe, a amu atu ai oia i te tahi paura taero roa, mai te mana'o e, e paura faataoto ia. Ia iteahia e, e mea taero ia ta'na i amu, ua tii-vave-hia te taote, e muri a'era, ua faaorahia oia.

I te fenua ra, i Colorado, i Amerika, a hamani noa'i, te hoê taata, o Ioane Lupatona, to'na i'oa, i te hoê fare apî, ite ihora oia i te hoê urî taehae i te hororaa'tu ma te hoê moa i roto i to'na vaha. Ua taora tano roa atura oia i ta'na hamera i taua urî taehae ra, e pohe roa ihora te urî taehae, e haere tiamâ atura te moa.

Te opua ra te tahi mau taata Amerika, i te hamani i te hoê apoo rahi roa na roto i te Mou'a Ofai teitei, ia tia i te mau pereoo auahi ia haere, mai Utaha, i Amerika, e tae noa'tu i Colorado, na roto i te mou'a. I teie nei te haere noa ra te mau pereoo auahi i nia i te mou'a, area râ e ere ia te ravea maitai, no te mea, e mea rahi roa te arahu tei pau i te reira. E pau i teie ohipa apî, e 5,000,000 dara; e ravea maitai roa râ ia.

Ua haapao ihora matou i to matou Matahiti Apî i Papeete nei, i te pô i te mahana 31 no Ditema. I na mahana rii i mua'e, ua tahoêhia te mau mana'o no to te Ekalesia i Papeete, e aufau maira ratou paatoa i te moni rii tai hoê raera i te taata hoê, ei tautururaa mai i te hooraa i tahi maa maa iti, e au ai i taua haaputuputuraa ra. Ua tairuru maira te mau taata no te Ekalesia, e te tahi atu â mau hoa, i roto i te fare parahiraa no te mau orometua, i te hora hitu e te afa i te pô, e muri iti a'era ua faatupuhia te tahi mau huru arearea maitai roa, e oaoa ihora te mau taata paatoa. I te hora iva e te afa, faaea ihora matou i te arearea, e amu a'era i te pape toetoe, e te faraoa monamona, i hamanihia e Tiulia raua o Made, e te tahi atu â mau huru maa maitatai roa, i faaineinehia e raua. Ia paia maitai te mau taata, arearea faahou ihora matou, e tae noa'tu i te hora ahuru ma hoê, ei reira haere ana'e atura matou i roto i te fare pureraa, e haapaohia ihora to matou pureraa no te Matahiti Apî. E oti a'era na himene, e te pure, tia maira te mau taata i nia, e iriti maira i to ratou mau mana'o poto, mai te faaite mai i to ratou mau opuaraa maitatai apî, e mai te haamaitai noa'tu i te Atua no te mau haamaitairaa, ta'na i horoa mai ia ratou i roto i te matahiti i pau a'enei. Ia tae i te hora ahuru ma piti e te afa, ua faaotihia te pureraa, e tia a'era te mau taata, e tuu ana'e ihora ratou i te tapao aroha, te tahi i te tahi, no te Matahiti Apî, e haere atura matou taatoa i to matou ihora mau utuafare ma te mauruuru, e te popou rahi.

Toae a Maire, Faaau Parau,

Rue Dumont d'Urville, Orovini, Papeete, Tahiti.

Frank J. Fullmer, Imprimeur,

Rue Bréa et de la rue Dumont d'Urville, Papeete, Tahiti.